

Fascia 24

I ladins é l'81,5%

8092 sentadins del Comun general se à declarà ladins, con n picol smendrament perzentuèl respet al 2001

Dombrament: i ladins tegn, te Fascia i é resté sora l'80%

8092 sentadins del Comun General de Fascia se à declarà ladins, n numer smaorà respet al 2001 de 539 unità, pur con n picol smendrament perzentuèl

Sozietà - Te Fascia i prumes dac sul numer de chi che se à declarà ladins tel dombrament de l'otober del 2011 i à soscedà sodesfazion. De duc i sentadins del Comun General, che ai 9 de tober de l'an passà i era de 9923, ben 8092 i à

cernù de scriver ite l'foi de la declarazion de partegnuda linguistica indican sia partegnuda al grop linguistich ladin. Na perzentuèla del 81,54% de duta la popolazion, e de béleche 182% anter chi che à responet. Anter l'prim

dombrament di ladins de Fascia, chel fat demò te noscia val del 1995 en atuazion al decret 592/93, e l dombrament del 2001, fat demò 6 egn dò, i ladins era jic jù de béleche 13%. Chest'outa, dò 10 egn, somea che noscia "ladinità" abie tegnù de

più: l'é stat n smendrament pech sora l'1%, e tegnan cont del gran increment demografich de chisc egn te Fascia, en bona pèrt ence frut de imigrazion, l'é segur n dat bon. La tabela chiò sot ite moscia l numer de sentadins che se à declarà

ladins, ti desvalives paijes de Fascia, del 1995 e dapò del 2001 e del 2011, e l dat perzentuèl. La perzentuèles per paisc era states fates en raport ai formulères scric ite, la perzentuèla de val enveze é stata fata sul numer total di sentadins.

Comun	1995	2001	2011	desferenza 2011 - 2001	desferenza 2011 - 1995
	ladins %	ladins %	ladins %	ladins %	ladins %
Cianacei	1505 82,4%	1498 82,5%	1524 79,7%	+26 -2,8%	+19 -2,7%
Ciampedel	654 92,2%	625 85,4%	608 82,2%	-17 -3,2%	-46 -10,0%
Mazin	373 85,6%	381 86,6%	381 77,3%	= -9,3%	+8 -8,3%
Poza	1575 92,9%	1587 88,9%	1765 82,6%	+178 -6,3%	+190 -10,3%
Vich	887 91,5%	921 85,8%	1059 87,7%	+138 +1,9%	+172 -3,8%
Soraga	574 89,4%	574 84,8%	629 85,5%	+55 +0,7%	+55 -3,9%
Moena	2029 78,2%	1967 75,6%	2126 78,8%	+159 +3,2%	+97 +0,6%
* i dac perzentuèl per comun se referesc ai formulères scric ite, l total de val l'é en raport al numer de sentadins Fascia					
Fascia	7597 85,6%*	7553 82,8%*	8092 81,5%*	+539 -1,3%	+495 -4,1%

Vich l più ladin del Trentin, Moena cresc de più

L'é Vich, con so 87,7% de ladins, l paisc più ladin de dut l Trentin, a chel che ge va dò Soraga con l'85,5%. Ma a vardèr la tabela sul sit de l'ISTAT del Trentin, olache i comuns é stac metui en orden dò l numer assolut de ladins, se veit che al prum post l'é Moena, che con si 2126 ladins l'é l comun con più ladins de dut l Trentin, dant da Poza con si 1765 ladins.

Moena, perauter, l'à ence n auter record: l'é l soul Comun de Fascia olache la perzentuèla de ladins se à smaorà no demò respet al 2001

(+3,2) ma adertura ence respet al 1995 (+0,6). Alincontra Poza, che pur sora la media de 82,6%, l'é l Comun che respet al 1995 l'é jic jù più "endò": dal 92,9% de jai 16 egn l'à perdù ben l 10,3%. L smendrament maor ti ùltime 10 egn l'é stat enveze chel de Mazin, che del 2001 l'era al secondo post dò Poza, col 86,6%, e ades l'à perdù l 9,3 e col 77,3% l'é ruà a l'ùltim post de Fascia en cont de "ladinità". Te la pruma analises l'é stat dit che Mazin e Poza l'é i paijes olache l'é

stat fat sù l maor numer de cèses neves, en coprativa o desche seconda cèses, olache se à enciasà sentadins che vegn da fora, e chesta podessa esser la rejon del smendrament. L record negatf a livel assolut ge pervegn ampò a Ciampedel, l soul Comun de Fascia (e de segur ence chiò peisa la situazion demografica) olache i ladins no se à smendrà demò a livel perzentuèl ma ence desche numer: del 1995 i era 654, del 2001 i é calé a 625 e del 2011 adertura a 608. (lg)



I ladins de Fascia à tegnù pur con mudamenc anter n paisc e l'auter.

I ladins tel Trentin: più nonejes che fascegn

I sfões à uzà fora con de gregn titoi l "despas" di ladins de la Val de Non respet a chi fascegn. Se ti 7 Comuns de Fascia, defat, i ladins i é 8092, ti 41 Comuns de la Val de Non a se declarèr ladins l'é stat en dut 8730 sentadins, con na media del 23% e na punta del 49,5% a

Romallo, paisc de Caterina Dominici. Te la lingia di comuns ladins del Trentin, al 5° post (dò Moena, Poza, Cianacei e Vich) l'é Cles con 931 ladins (l 13,7% sun 6775 sentadins), e dant da Mazin de comuns nonejes n'é etres 5. Enteressant ence veder che Trent

l'é l 15° Comun ladin de la provinzia, con si 368 ladins (0,3% de si 114.609 abitanc): cotenc de chisc sarè de naa fascegn e cotenc enveze magari noneja? En dut aboncont da chest dombrament vegn fora che i ladins tel Trentin i é 18.550: l 3,5% de la popolazion provinzièla. (lg)

La sodesfazion del conseier Luigi Chiocchetti e de la Procuradora Cristina Donei

Tant l'assessor a la mendranzes Luigi Chiocchetti che la Procuradora Cristina Donei se à dit contenc de l'ejit arjont. "Posse dir mia sodesfazion - à dit Chiocchetti - percheche l'é stat sostanzialmenter confermà i dac del 2001, ence per chel che vèrda de chest vers. I dac definitives permetarà na analisa più menuda".

La Procuradora veit te chest ejit la conferma de "na comunanza che tegn adum, che l'à decidù so davegnir e sia identità, descheche l'aea jà desmostrà en ocajon del referendum contra l Comun General. Chisc segnes positives é da lejer - l'à dit - ence tel numer semper maor de jent che

se scric ite ai eames de ladin, e te la scomenzadives de politica linguistica che vegn metudes a jir da l'ofize linguistich del Comun general con la preziosa colaborazion de la istituzions (Scola, Istitut Cultural) e de la sociazions che laora per l ben de la cultura ladina. L bon ejit de Moena - à jontà amò la Procuradora - desmostra che chesta comunanza vel dezider enstessa sia identità, e no che zachei autres dezide per ela. E en cont di ladins nonejes - l'à feni fora - no se pel confrontèr i numeres assoluc de na comunanza de 40.000 sentadins e una de 10.000, na perzentuèla del 81% la é ben desferenta da chela del 23%. Somea che i nonejes abie na coscienza identitara mingol "tardiva": te nosc senester percors per l recognosciment desche mendranza no i ne à mai sostegnù." (lg)



La Procuradora Cristina Donei con l'assessor a la cultura del CG Renzo Valentini.